

# Un Pildora Muchu Marga pa Guli?

Resientemente vários atvertensia alarmante a resoná ku nos yunan ta hogando den e abismo skur di perdishon. Muchanan ta wak televishon pa loko, inkluiendo programanan i pelikulananan ku ta produsí agresividat i otro karakteristiká negativo. Muchanan bou di dies aña ta bebe serbes i ta purba droga. Alumnonan di skol básiko ta sali na estado i ta abortá e kriatura inosente.

Tin gritonan desesperá pa mayornan tuma nan responsabilidat na serio, eduká nan yunan i elevá normanan i balornan pèrdí. Nos tambe ta di akuerdo! Ma mayornan awendia no tin tempu pa eduká nan yunan. Kiko ta e solushon?

Un parti krusial di e kontesta ta mas kla ku di dia! Kualke ken ku ta por ripar'é, sin ta un eksperto riba tereno di asuntonan sosial òf familiar. Nos grandinan sa e solushon bon. Ma maske e kontesta ta opvio, ta parse ku "ekspertonan" ta bira rònt di dje sin ke menshon'é. Talbes e ta un tópiko tabú—un píldora muchu marga pa guli.

Kiko por ser hasí? Skritura ta konsehá mamanan pa "perkurá pa nan kas" (Tito 2:5). E teksto aki por ta tradusí, "traha na kas." Si mamanan lo tuma retiro di trabou i KEDA KAS KU NAN YUNAN, nan lo por dediká e tempu i atenshon pa e yunan haña e edukashon moral ku ta hasi tantu falta awendia.

Ma tin resistensia pisá kontra e konsepto aki pa entre otro dos motibu: algun mama KE e empleo, otro mama MESTER traha.

Maske entrada di tata ta adekuá, tòg hopi pareha KE p'é mama tambe traha. Den hopi kaso (no tur) e motibu bèrdadero, kubrí ku ekskusanan, ta materialism. Mama ta traha ora e yunan ta beibi, pasobra nan a hinka nan kurpa den debe pa konstruí nan propio kas. Ora e yunan ta mucha, mama ta sigui traha pa paga debe pa konstruí un flèt pa hür. Mama ainda ta empleá ora e yunan ta tineidjer pa kumpra fèn di plafòn, èrko, sèt di sala i sèt di komedor nobo, outo nobo, èts. Anto nan no por imaginá nan kiko a pasa ora e yu muhé di 15 aña ta sali na estado i e yu hòmber ta usa di droga.

Materialismo ta chokando nos komunidad! Segun un enkuesta na Merka, 67% di e mamanan empleá ta traha pasobra nan KE, no pasobra nan MESTER. Nan ta preferá kos nèchi riba yunan desente. Mayornan ku ta sigui e ruta di materialismo ta hinka nan yunan den un kamina di perdishon. Nos yunan lo sigui bai pèrdí riba laman di bida tanten ku mayornan ta insistí pa mama traha na lugá di keda kas pa duna e yunan un kompas pa bida, siñando nan normanan i balornan sano.

Di otro banda, tin mama ku MESTER traha. Nan ta haña nan obligá pa buska empleo pa kousa di divorsiá, morto di esposo, òf pasobra nan nunca a kasá. Ta sobra poko tempu pa e yunan. Nos tin komprehon pa situashonnan asina.

Sinembargu, nos ta masha hipókrita pa ku salimentu na estado sin ta kasá. Nos ta lamentá ku tin tantu mama soltero, ma nos ta sigui enkurashá nos yunan pa hasi sèks! NOS ta bisa, "Por hasi sèks, ma hasié protehá!" DIOS ta bisa, "Es(un) ku ta hasi fornikashon ta kometé piká..." (1 Korintionan 6:18). Tantén ku nos ta sigui promové e inmoralidat di kondom na lugá di apstinensia promé ku matrimonio, nos lo sigui eksperensia e epidemia di mamanan soltero!

Yunan di mamanan soltero hopi bes ta falta e guia di nan mama. E muchanan ta pa nan kuenta te ora e ta yega di trabou. Anto pa kolmo, e ta yega kansá, i konsekuentemente ta kohe e mucha ku sla pa e mínimo kos. Sífranan ta indiká ku un porsentahe grandí di aktonan kriminal ta kometé pa yunan unda tin un mayor so. Si nos ke eliminá e fenómeno di mamanan soltero, nos mester siña nos yunan for di awor ku APSTENENSIA TA E UNIKO RUTA faktibel.

Ma tantén ku nos ta insistí di kore tras di materialismo i kondom, mamanan LO mester sigui traha, nifikando ku hopi yu lo keda sin haña e guia i edukashon moral ku nan tin mester. Nan lo sigui wak televishon pa loko, sigui kometé krimennan, sigui abortá na edat hóben, sigui kome sla na man di e mama kansá despues di un dia pisá na trabou, èts.

E preskripsjon aki no ta disífil pa desifrá. Ma pa mayornan ku ta preferá nan bida di materialismo i filosofia di kondom, sigur esaki lo keda un píldora muchu marga pa guli.